

# LÖG

## KJÖRDÆMISRÁÐS SJÁLFSTÆÐISFLOKKSINS

### Í SUÐVESTURKJÖRDÆMI

#### Kjördæmisráð

##### 1. grein

Sjálfstæðisfélögin og fulltrúaráð sjálfstæðisfélaganna í Suðvesturkjördæmi mynda með sér sameiginlegt ráð, er nefnist Kjördæmisráð Sjálfstæðisflokksins í Suðvesturkjördæmi.

##### 2. grein

Hlutverk kjördæmisráðs er að fara með sameiginleg flokksmál í kjördæminu í umboði miðstjórnar.

#### Skipan kjördæmisráðs

##### 3. grein

1. Fulltrúaráð sjálfstæðisfélaganna kjósa hvert um sig fulltrúa í kjördæmisráð, einn fulltrúa fyrir hverja 10 fulltrúaráðsmeðlimi eða brot úr þeirri tölu, sbr. 41. gr. skipulagsreglna Sjálfstæðisflokksins.
2. Að auki kjósa félögin í kjördæmisráð sem svarar einum fulltrúa fyrir hverja 50 fullgilda félagsmenn sjálfstæðisfélaga í umdæminu eða helmingabrot þeirrar tölu eða meira, í réttu hlutfalli við fjölda fullgildra félagsmanna á síðasta aðalfundi félagsins. Þó skal félag, sem ekki nær þessari tölu hafa rétt til að kjósa einn fulltrúa í kjördæmisráð. Stjórn fulltrúaráðs skiptir fulltrúum milli félaganna eftir þessari reglu. Vilji félögin ekki una þeirri skiptingu, geta þau lagt ágreininginn undir úrskurð almenns fundar í fulltrúaráðinu, en síðar má skjóta málinu til kjördæmisráðs, sem hefur endanlegt útskurðarvald.
3. Formenn fulltrúaráða, formenn kjördæmissamtaka ungra sjálfstæðismanna, kvenna og eldri sjálfstæðismanna og formaður launþegaráðs sem nær yfir kjördæmið, kjörnir þingmenn flokksins í kjördæminu og stjórnarmenn í stjórn kjördæmisráðs eru sjálfkjörnir í kjördæmisráð.
4. Frambjóðendur í aðalsætum á lista Sjálfstæðisflokksins í kjördæminu við hverjar alþingiskosningar, aðrir en kjörnir alþingismenn, skulu hafa rétt til fundarsetu á fundum kjördæmisráðs, með málfrelsi og tillögurétti, en hafa þar ekki atkvæðisrétt nema þeir séu kjörnir fulltrúar. Sama á við flokksráðsmenn í kjördæminu og oddvita á framboðslistum til sveitarstjórna eigi þeir ekki sæti í kjördæmisráðinu.

##### 4. grein

Fulltrúar í kjördæmisráði skulu kosnir árlega á aðalfundum fulltrúaráða og sjálfstæðisfélaga. Umboð kjördæmisfulltrúa gilda frá aðalfundi viðkomandi fulltrúaráðs eða sjálfstæðisfélags til næsta aðalfundar þess.

Þrátt fyrir ákvæði í 1. mgr. falla umboð kjördæmisfulltrúa úr gildi ef meira en átján mánuðir eru liðnir frá því þeir voru kosnir, miðað við fundardag kjördæmisráðs.

## Stjórn kjördæmisráðs og verkefni hennar

### 5. grein

Stjórn kjördæmisráðs skal skipuð 7 mönnum og jafnmörgum til vara. Skal formaður kosinn sérstaklega.

### 6. grein

Kjördæmisstjórn skal:

1. Annast framkvæmdastjórn kjördæmisráðs.
2. Sjá um, að flokkskerfið í kjördæminu sé í samræmi við skipulagsreglur flokksins.
3. Fylgjast með því, að fulltrúaráðin og sjálfstæðisfélögin kjósi reglulega fulltrúa í kjördæmisráð.
4. Hafa vörslu kjördæmissjóðs og annarra sameiginlegra eigna flokksins í kjördæminu.

### 7. grein

Árgjald sem ákveðið er á aðalfundi skal greitt í kjördæmissjóð fyrir hvern fullgildan félagsmann í sjálfstæðisfélögum þeim, sem standa að kjördæmisráðinu.

### 8. grein

Kjördæmisstjórn hefur heimild til að skipa þær starfsnefndir fyrir kjördæmisráð, sem þörf krefur á hverjum tíma.

## Kjörnefnd vegna alþingiskosninga

### 9. grein

Í kjörnefnd eiga sæti: Formaður kjördæmisráðs og skal hann jafnframt vera formaður kjörnefndar. Varaformaður kjördæmisráðs skipar sæti formanns í forföllum hans þá eiga formenn fulltrúaráða sjálfstæðisfélaganna í kjördæminu sæti í nefndinni og í forföllum þeirra varaformenn fulltrúaráðanna.

Á fundi kjördæmisráðs sem stjórn þess boðar til með öruggum hætti og að minnsta kosti viku fyrirvara, skal kjósa fulltrúa í kjörnefndina, einum fleiri en tala hinna sjálfkjörnu fulltrúa er hverju sinni. Jafnframt skal kjósa þrjá varamenn er taki sæti kjörinna aðalmanna í forföllum þeirra.

Kjörnefnd gerir tillögur til kjördæmisráðs um framboðslista flokksins við kosningar til Alþingis.

### 10. grein

Kjördæmisráð ákveður framboðslista flokksins við kosningar til Alþingis. Þegar ákveða skal framboð, skal til þess fundar boðað á þann hátt, að allir ráðsmenn fái örugglega vitneskju um fundinn og dagskrá hans með minnst viku fyrirvara. Til þess að listi sé lögmaður, þarf meirihluti

atkvæðisbærra fundarmanna að samþykkja hann. Skylda er að hafa leynilega atkvæðagreiðslu, ef þess er óskað.

Stjórn kjördæmisráðs skal leita staðfestingar miðstjórnar á framboðslistum í samræmi við 54. grein Skipulagsreglna Sjálfstæðisflokksins.

#### **11. grein**

Þegar framboðslisti flokksins til Alþingiskosninga hefur verið ákveðinn, skal stjórn kjördæmisráðs, ásamt formönnum fulltrúaráðanna og frambjóðendum í aðalsætum á lista flokksins, mynda kosningastjórn, sem sameiginlega stjórnar og ber ábyrgð á kosningunum. Kosningastjórn ræður eða skipar síðan 3 menn í framkvæmdastjórn.

#### **Prófkjör**

#### **12. grein**

Ákveði kjördæmisráð að viðhafa prófkjör við val á frambjóðendum til Alþingiskosninga fer það fram á samræmi við samræmdar framkvæmdareglur miðstjórnar Sjálfstæðisflokksins sbr. 56. grein Skipulagsreglna Sjálfstæðisflokksins.

#### **Aðalfundur kjördæmisráðsins**

#### **13. grein**

Aðalfundur kjördæmisráðs skal haldinn ár hvert og eigi síðar en fyrir lok febrúarmánaðar. Fundinn skal boða öllum aðildarfélögum með minnst viku fyrirvara. Stjórn kjördæmisráðs boðar til aðalfundar og ákveður fundarstað og tíma og gildir hið sama um aðra fundi kjördæmisráðs.

#### **14. grein**

Á aðalfundi kjördæmisráðs skal starfa uppstillingarnefnd, er gerir tillögur um kosningu stjórnar og fulltrúa í flokksráð, hún skal skipuð formönnum fulltrúaráðanna. Formaður kjördæmisráðs boðar nefndina til fyrsta fundar, en nefndin kýs sér formann.

#### **15. grein**

Á aðalfundi kjördæmisráðsins skal eftirtalið tekið fyrir:

1. Skýrsla fráfarandi stjórnar og reikningar kjördæmisráðsins.
2. Lagabreytingar.
3. Ákvörðun árgjalds.
4. Stjórnarkjör.
  - a. Kosning formanns.
  - b. Kosning 6 stjórnarmanna.

- c. Kosning 7 varamanna.
5. Kosning tveggja endurskoðenda og eins til vara.
  6. Kosning fulltrúa í flokksráð skv. 14.gr. Skipulagsreglna Sjálfstæðislokksins.
  7. Önnur mál.

#### **16. grein**

Lögum þessum má aðeins breyta á aðalfundi og þarf 2/3 hluta atkvæða allra atkvæðisbærra fundarmanna til að breytingin nái fram að ganga.

#### **17. grein**

Nú óska a.m.k. 20 kjördæmisráðsmenn skriflega eftir því við stjórn kjördæmisráðs að fundur verði haldinn í ráðinu um tiltekið mál og skal stjórnin þá verða við þessari ósk eigi síðar en 14 dögum eftir að henni barst hin skriflega ósk um fund. Þessi fundur er ekki ályktunarfær nema helmingur kjördæmisráðsmanna sé mættur.

#### **18. grein**

Lög þessi öðlast þegar gildi.

Þannig samþykkt á stofnfundi kjördæmisráðs Suðvesturkjördæmis, Kópavogi föstudaginn 6. október 2000.

Þannig samþykkt á aðalfundi kjördæmisráðs Sjálfstæðisflokksins í Suðvesturkjördæmi, 23. október 2001.

Þannig samþykkt á aðalfundi kjördæmisráðs Sjálfstæðisflokksins í Suðvesturkjördæmi 20. október 2011.

Þannig samþykkt á aðalfundi kjördæmisráðs Sjálfstæðisflokksins í Suðvesturkjördæmi 7. mars 2019.

Ákvæði til bráðabirgða sem bætist við lögin:

Þrátt fyrir ákvæði 13. gr. laganna skal næsti aðalfundur kjördæmisráðsins, þ.e. aðalfundur ársins 2012, haldinn eigi síðar en fyrir lok febrúarmánaðar árið 2013. Umboð stjórnar og annarra fulltrúa sem kosningu hlutu til trúnaðarstarfa á aðalfundi 20. október 2011 skal gilda þar til á þeim fundi, en þá skulu lögmælt aðalfundarstörf ársins 2012 fara fram, þar með talin umfjöllun og afgreiðsla reikninga kjördæmisráðsins vegna ársins 2011.